

王荊公詩文注

四



王荊公文集注卷三

吳縣沈欽韓撰

敕勝交趾敕交州管內溪峒軍民官吏等眷惟安南世
受王爵撫納之厚實自先朝含容厥愆以至今日而乃
攻犯城邑殺傷吏民干國之紀刑茲無赦致天之討師
則有名已差吏部員外郎充天章閣待制趙禹充安南
道行營馬步軍都總管經略招討使兼廣南安撫使昭
宣使嘉州防禦使入內侍省都押班李憲充副使龍
衛四廂都總管指揮使忠州刺史燕達充副都總管順
時興師水陸兼進天示助順已兆布新之祥人知悔亡
咸懷敵愾之氣然王師所至弗迓克奔咨爾土庶久淪

塗炭如能諭王內附率眾自歸爵祿賞賜當倍常科舊惡宿負一皆原滌乾德幼稚政非已出造廷之日待遇如初朕言不渝眾聽無惑比聞編戶極困誅求已戒使人具宣恩旨暴征橫賦到卽蠲除冀我一方永爲樂土長編熙甯八年十一月二十日交趾陷欽州後三日又陷廉州十二月丁酉交趾圍邕州初沈起經略廣西妄言被旨謀討交趾又擅撫納恩靖州儂善美及於融宜州彊置城寨殺人以千數交人震擾詔以劉彝代起冀使招輯之而彝乃更妄意朝廷有攻取謀欲以鉤奇立異爲功始遣官入溪峒點集土丁爲保伍授以陣圖使歲時肄習繼命指使因督鹽運之海濱集舟師寓教水

戰故時交人與州縣貿易一切禁之於是交趾大集兵
丁謀入寇知邕州蘇緘伺知其實以書抵彝請罷所行
三事如故無使交人興師有名彝不聽反移文劾緘沮
議又責令不得輒言邊事緘聞賊且至閱郡兵得廂禁
卒并老弱才二千八百人固守十二月癸丑詔趙鼎李
憲等進討詔曰云云王安石之辭也時交趾所破城邑
卽爲露布揭之衢路又言中國作青苗助役之法窮困
生民我今出兵欲相拯濟安石怒故自草此詔長編熙
甯六年四月丁丑引陳瓘論曰沈起引惹蠻事致令交
趾犯邊圍陷邕州欽廉失守生事者起人皆知之造謀
者安石人不盡知也邊事未作之時神考有罷起之詔

曰熙河用兵未有息期沈起又于南方妄作引惹欲治起罪以安中外安石不肯奉詔明年果有事宜三州之民肝腦塗地數路騷動一人焦勞當時詔語罪悉在起然起之所以得不死者良以安石護起神考重違其請耳安石退而著書追記其事則謂沈起經制皆上密謀諸公皆不與聞起所奏乞上皆許之嗚呼四作邊事二敗二勝韓絳橫山沈起交趾敗也王韶熙河章惇梅山勝也二勝則掠美于已二敗則歛怨于君呂誨之言辨之早矣東軒筆錄交趾浮海載兵擊陷廉白欽三郡圍邕州僅四十日城陷殺知州蘇緘屠其城掠四郡生口而去朝廷盡鑒前後守臣之罪以次貶黜九年正月手詔中書沈起貸死削奪在

身官爵送遠惡州軍編管未行二月庚寅沈起劉彝俱
責團練副使安置蓋王安石右沈起故改從薄責也贈
蘇緘節度使料秦晉銳兵萬人發軍騎南討詔以趙高
爲經畧使高引郭逵共事遂以逵爲宣撫使而高副之
逵頓兵邕州久之進克廣源州機榔縣而賊據富良江
以扼我師逵閉壁四十日竟不能度旣而糧道不繼瘴
毒日甚十萬之眾死亡十九僅得交趾降表遂班師建
廣源爲順州明年交人始入貢廣源嵐瘴特甚自置州
凡知州及官吏戍兵至者輒死每更戍之卒決知不還
舉營號哭會曾布帥桂乞棄順州明年交人歸生口數
百遂以廣源與之

趙嵩充安南道行營馬步軍都總管經略安撫招討使
兼廣南安撫使趙嵩傳擢天章閣待制交趾叛詔爲安
南行營經略招討使總九將軍討之以中官李憲爲貳
離與議不合請罷憲神宗問可代者離以郭逵老邊事
願爲裨贊于是以逵爲宣撫使離副之逵至輒與離異
離欲乘兵形未動先撫輯兩江峒丁擇壯勇啖以利使
招徠攜貳隳其腹心然後以大兵繼之逵不聽離又欲
使人齎敕榜入賊中招納又不聽賊據江列戰艦數百
艘官軍不能濟離分遣將吏伐木治攻具機石如雨其
艦被擊皆廢徐以罷卒致賊設伏擊之斬首數千級馘
其渠酋遂皆降逵作于玩寇乃移疾去逵旣坐貶離亦

以不卽平賊降爲直龍圖閣知桂州按揮塵後錄以宰相吳充忌郭逵成功堂帖令班師致全軍覆沒者妄談也辨已見詩注

昭宣使嘉州防禦使入內侍省都押班李憲宦者傳李憲爲熙河經略安撫使幹當公事破木征以功加昭宣使嘉州防禦使還爲入內侍省押班長編熙甯九年二月丁亥宣徽南院使雄武軍留後判太原府郭逵爲安南道行營馬步軍都總管招討使改趙鼎爲副使仍罷李憲王安石白上中人監軍唐叔世弊事不可踵始吳充與安石爭伐交趾利害安石言必可取充謂得之無益上竟用安石言罷憲舊錄李憲傳同新錄辨曰

按神宗實錄憲緣與趙鼎紛爭而罷按憲傳同非安石以中

人監軍爲言而罷按王繼恩傳加昭宣使破李順功別

立宣政使序位昭宣使上憲後亦從昭宣加宣政使

龍衛四廂都

一本訛衍總管

指揮使忠州刺史燕達劉延世孫

公談圃燕達爲兒時賣鴨卵嚴法華取其卵悉啖之既

而撫其背曰惜此身他日一箇節度使按嚴係言字之

誤僧志言以誦法華經得名見僧寶傳及宋史方技傳

燕達傳字逢辰開封人爲秦鳳副總管討破河州羌遂

降木征遷東上閣門使眞拜忠州刺史龍神衛四廂都

指揮使郭遠招討安南爲行營馬步軍副都總管

提轉考課敕詞

選舉志神宗卽位令考課院

淳化四年分置磨勘

司審官院掌京朝官考課院掌幕職州縣官考

凡職皆有課凡課皆責實監司

所上守臣課不占等者展年降資而治狀優異者增秩
賜金帛以璽書獎勸之若監司已上則命御史中丞侍
御史考校凡縣令之課以斷獄平允賦入不擾均役屏
盜勸課農桑振恤饑窮導修水利戶籍增衍整治簿書
爲最而德義清謹公平勤恪爲善參考治行分定上中
下等至其能否尤絕者別立優劣二等歲上其狀是時
內外官職各從所隸司以覈考而中書皆置之籍每歲
竟或有除授則稽差殿最取其尤甚者而進退之熙寧
五年遂罷考課院閒遣使察訪所至州縣條其吏課凡
知州通判上中書縣令上司農各注籍以相參考惟侍

從出守郡聽不以考法朝廷察其治焉

神宗紀治平四年冬十月己酉

以權御史中丞滕甫考諸路監司課績

韓琦加恩制事實類苑王元之在翰林當草夏州李繼

遷制繼遷送潤筆物數倍于常然用啟頭書送拒而不納蓋惜事體也近時舍人院草制有送潤筆物稍後時者必遣院子詣門催索而當送者往往不送相承既久今索者送者皆恬然不以爲怪也大禮後加恩卽學士齋宿翰長草第一學士以次分之如四廳學士卽翰長卻草第五他皆類此楊文公談苑翰林規制自妃后皇太子親王公主宰相樞密使節度使並降制用白麻紙書每行四字

按西溪叢話麻一行二字

不用印進入後降付正衙宣

讀其麻卽付中書門下當日本院官告院取素綾紙待詔寫官告只用麻詞官告所署中書三司官宣奉行並依告身體式常用門長一人銜位按此乃熙甯元年南郊後加恩僅加戶數殆于虛名無益而重費告詞也

推誠保德崇仁守正協恭贊治亮節翊戴功臣職官志功臣宰相初加六字餘官初加四字其次並加兩字此乃累加至十六字復加佐運至十八字其名則以賜皇子皇親文武臣僚外臣者與宰相樞密不同豈罷政後例當改易歟推誠志並作旌忠

淮南節度按韓琦傳堅辭位除鎮安武勝軍節度使司徒兼侍中判相州琦辭兩鎮乃但領淮南

〔檢校太師〕職官志檢校官十九太師爲第一容齋三筆
元豐以後罷檢校官

李璋加恩制事實類苑外臣除節度使景德已前止舍

人院作制

節度使之權廢故簡畧其事耳非故事也

楊文公外制集載潘羅

支廝鐸督朔方軍節度使數制是也其後遂學士院降

麻如大禮加恩在將相後數日方下然不鎖院不宣麻

近年遂同將相例鎖院告廷矣外戚傳李用和

章懿皇太后弟

子璋字公明累遷武勝軍節度使殿前都指揮使改振

武軍知郢州還朝卒傳中不載其爲奉甯節度

〔翊衛功臣奉甯軍節度〕職官志拱衛翊衛等號賜諸班

直將士禁軍初加二字再加亦如之然此已爲節度而

仍號翊衛疑志言未必然九域志鄭州景祐元年升奉甯軍節度熙甯五年廢隸開封府元豐八年復置山堂考索後集乾德中平湖南令潭州諸郡直屬京師至太宗藩鎮無復支郡皆不預簽書刑獄金穀之事

使持節鄭州諸軍事鄭州刺史兼御史大夫上柱國容齋三筆元豐已後罷持節憲銜勳官隆平集凡節鎮有節度使印隨本司闕則本州吏用本州觀察使印又有州印文曰某州之印晝則州錄事參軍掌用暮則納長吏所節度使在本鎮兵刑甲仗卽節度判官掌書記推官連書用節度使印民田租賦事卽觀察判官支使推官連書用觀察使印州司下符用本州印故命將必曰

某軍節度使得專制其軍旅也曰某州觀察使得廉問其風俗也曰某州刺史得刺舉其州軍也却埽編本朝節度使雖不赴鎮然亦別降勅書宣諭本鎮軍民而爲節度使者亦自給榜本鎮謂之布政榜親王亦翰苑爲之按領節度者必兼觀察處置等使此唐制也宋時建節者往往遙領而別蒞州府則雖有節度觀察二印無所用之惟李璋所授皆是本任得施三印也

入總營衛則兵師無譴本傳璋爲殿帥仁宗崩禁衛相告乾興故事內給食物中有金旣而果賜食眾視食中璋曰天子未臨政已優賞汝何功復云云敢諠者斬眾乃定

貢職惟修祀儀獲考宋制凡卽位初郊文武大臣州郡皆有進奉助禮按舊五代史郭崇韜傳及郊禋悉獻家財以助賞給則進奉之禮由來久矣其他慶禮聖節端午冬至等節皆貢銀幣或馬又不一也老學庵筆記宋白集有諸道節度觀察防團刺史知州已下賀登極進奉詔書云朕仰承先訓續嗣丕基眷命厯之有歸想寰區之同慶卿輟由俸祿恭備貢輸遙陳稱賀之誠知乃盡忠之節省覽嘉歎再三在懷實眞廟登極時詔書也乃知是時貢物皆守臣以俸祿自備今旣以庫金爲貢而推恩則如故可謂厚恩矣按此典又知廢于南渡後也

皇伯祖威德軍節度使榮國公承亮加恩制威德無考
九域志耀州華原郡威德軍節度威字蓋誤宗室傳作
威德

李日尊加恩制交趾傳寶元元年進交趾郡王李德政
爲南平王至和二年卒子日尊遣人告哀尋除靜海軍
節度使安南都護封交趾郡王神宗卽位進封南平王
加開府儀同三司

可字下尙有新授官爵勲階檢校官功臣號食邑戶
數編集或以其文煩刪去之若全文則至主者施行方
訖

馮翊郡君連氏等賀皇帝南郊禮畢表此宮中命婦學